

大荔縣舊志稿

王典章題

續修大荔縣舊志存稿卷十

耆舊傳上

熊志援東漢方志例定名人物爲耆舊傳不敢僭同國史周志
照例今仍因之惟歷來志乘於人物每識郡縣不詳考其村落
夫方輿百里究生何所不特後進披讀企仰芳躅恆悵欲求
故里而無薄而熊志因舊志於郭典諸人但混志爲馮翊同州
人範圍遼廓難確定爲大荔人遂闕疑從刪周志病其拘泥致
古人虛懸仍補錄之其弊總由記載家之疏略致此紛訟此番
修傳於男女皆確實注明村落庶使觀者一目了然矣

補編

唐

嚴遵美馮翊人爲僖宗左軍容使常歎曰北軍供奉官以袴衫給事

今執笏過矣樞密使無廳事惟三楹舍藏書而已今堂狀帖黃決事此楊復恭奪宰相權之過也蓋疾時中官肆橫云爾遂致仕復徵爲兩軍中尉美曰一軍尙不可爲况兩軍乎固辭不起隱青城山年八十餘卒

張承業字繼元同州人爲唐昭宗內供奉善晉王李克用昭宗爲茂貞所迫將奔太原先遣承業使晉道意卽以爲河東監軍泊崔胤誅宦官在外者詔藩鎮悉誅之克用賢承業匿之朱溫篡唐晉用唐年號崇任承業克用病革承業奉遺顧輔存最嗣爵感遇效忠凡所以蓄積金粟收市兵馬招懷流散勸課農桑而成莊宗之業者承業之功爲多法不寬於貴戚謀嘗參於機要莊宗授以上將軍燕國公固辭終身稱舊官天祐十八年莊宗受諸道勸進將纂位承業諫曰大王父子與梁血戰三十年本欲雪國家之仇而復唐社稷今元兇未

滅而遽以尊名自居非王父子初心且失天下望不可莊宗謝以諸將所欲承業曰不然梁唐李之仇賊而天下所共惡也今王誠能爲天下去大惡復列聖之深仇然後求唐後而立之使唐之子孫在孰敢當之使唐無子孫天下之士誰可與王爭者臣唐家一老奴耳誠願見大王成功然後退身田野使百官送出洛東門而令路人指而歎曰此本朝敕使先王時監軍也豈不臣主俱榮哉莊宗不聽承業仰天大哭曰吾王自取之誤老奴矣不食而卒年七十七贈武衛上將軍諡曰貞憲

承業已入五代然乃心唐室生死不渝體其純忠附傳唐代

後唐

張瓘馮翊人承業猶子爲後唐麟州刺史有政績唐亡入晉轉密州刺史秩滿入都環侍衛漢乾祐二年卒於官

明

劉滿朝字宗源南胡村人幼聰慧知嚮學稍長卽歸正學弱冠入庠正德庚午舉於鄉年二十七數試禮闈不第嘉靖癸未授知山東利津縣事利津邊海繁邑且罷滿朝政尙節愛懲狡僞恤貧難敦士習不數月民風丕變部使者獎其無欲而剛吏畏其威民安其業旣報政銓部將擢升尋以萋菲中止遂解組歸囊橐蕭然惟以耕讀訓子孫爲樂其樸茂之質剛正之守始終不替也

張世登字子高城南厓上張家村人太僕春之父兄弟三人登爲仲性孝友復聰穎有幹略長兄世科不才而拘張氏之戶曰里長戶歲循次辦里事次及登家其父慮長子債事俾登任之時年十五遂廢讀辦公諸事就理名漸著州大夫重之每里有要公必令決諸張里長而行兄念曰我才何不爾若奪其職月餘竟以竄墮被笞復還之

弟其父卒科析產欲自由登與弟世榮阻之不得詎科任意妄爲而貧登又給貲使營業乃廢盡並其宅鬻之登數周給之及卒棺殮殯葬收養其妻子焉生平端嚴剛正遇盤錯事措理裕如兄雖弗順而弟則性情融洽出入相依老而彌篤晚年自號荔南居士優游頤養惟以實學實行勗其子萬歷四十七年年九十三歲卒時春官至南京刑部主事

張令字正太僕春之子生時有鶴棲庭樹之祥初春講學文武兼賅雖詩書弦誦而槍矛劍戟子弟皆嫻之令聰慧而秉質薄弱有黃冠授以導引法漸強健遂廢舉業入京衛武學中順天武舉第三名東事棘兵部以將材保薦領兵援寧錦有功實授守備崇禎二年以天津守備勤王守齊化門屢挫敵鋒旋隨父征復灤永四郡敘功晉都指揮僉事父以讒忌歸令奉命分守陝西參將征土寇屢捷韓邵宜

續修大荔縣志存稿 卷一
君間方賊逼韓原血戰尤力韓人皆乘城觀令兵無不以一當百時
所統者皆省兵多不習戰賊本易之令激厲指揮勇氣百倍賊風靡
而敗援韓諸軍列營城外韓人獨延令軍息兵城內以牛酒優犒令
兵秋毫無犯時父春再起監軍會統軍祖大壽師潰春孤軍赴援力
竭被執令聞耗痛極解兵歸值大荒粟貴物賤人相食令慷慨輸粟
散賑全活者衆迨清定鼎弟伸請出關歸父骸而令已歿矣

張執中西仁莊人明洪武七年舉孝廉初任宛平縣令特簡順天府
尹後以鹽運監察歷升戶部尙書政績卓著以養親致仕年逾七十
卒葬鑣山之南坡下其家譜記載可考

清

淡士淳字敦夫號樸堂文淵孫學問淵博質直好義精數學通岐黃
乾隆壬子科舉人嘉慶己未進士鄉試後就教職歷署延長懷遠邠

州學博教士以敦品爲先學風丕振甲科後薄競進風瀟然歸里教授生徒館舍幾莫能容治家嚴而有法恪守寒素督子弟綦嚴卽學未成就亦必量材器使不失爲勤飭之士著有糟粕集六卷樸堂詩集文集若干卷

朱清耀字德園東大村人以廩貢生捐教職選商州訓導課士有法後報最遷江蘇句容縣丞旋舉卓異歷署溧水儀徵江寧等縣知縣實任丹陽調補南匯仕宦三十餘年果於任事廉幹有爲凌晨坐堂日昃不遑暇食與邑賢士講求地方利弊孜孜不倦聽訟不尙刑威呼兩造於前委曲開導使皆心折而後已寒士翹楚者常招入署內自教之宰丹陽時歲歉勸富民各就其村中出粟散放輔官力所不逮宰南匯歲荐飢創設義倉先捐己資富民踴躍從事數月竣工南匯鄰川沙廳有白蓮涇長浜呂家浜小腰涇爲民田水利所關久淤

經修方嘉鼎舊志存稿 卷一
塞費鉅弗克復清耀請於大府慨捐鉅款約富民共濟之凌晨至河
干指示機宜均其役於民民皆樂爲之用工竣邑人士繪督民濬渠
圖以爲之壽又製頌語云人傳隴右來生佛帝許江南作福星生平
持己尤嚴常以唐制三最漢賢四知揭櫫自懷中丞林少穆嚴覈吏
治重其賢具聞於朝加知州銜年周甲告歸樂施與勤誘掖怡然渙
然年七十五卒

淡大燮字理元淡家莊人有至性讀書能默識家貧未卒業貿易廣
東安徽等處繼以家有老母不忍遠離日訓生徒兼務農業其艱苦
人弗能堪而大燮承歡膝下晏如也年四十得一子督責極嚴或勸
曰晚年得子盍少寬燮曰教之乃所以愛之也後以子俊貴贈中書
科中書銜

黃大鶴字芝山黃家村人道光乙酉拔貢生朝考一等以小京官分吏部歷轉本部主事員外同治癸酉京察一等遷郎中記名以道府用光緒元年簡授山東沂州府知府沂爲東省東南門戶盜賊出沒無常到任募勇緝捕擒獲積年巨匪合郡稱快暇日接見士紳於吏治民生地方利弊加意講求頌聲遂交作焉旋調濟南故事通省疑難大案皆下首府覆訊以昭慎重大鶴率屬判決持平繁獄爲之一清性直爽不畏強禦上游前事有不可輒力爭之屬吏亦望風敬憚尋以卓異升充沂曹濟道未幾擢鹽運使十二年丙戌署理臬司積勞病故入祀山東名宦祠生平政績山東續通志已載入焉

黃華字月卿亦字立齋大鶴次子天資超特有巧思舉業餘暇輒講求格致建造各學饒有心得父嘗戒以學賅道藝毋稍偏廢華才力富有竟一貫之入庠後鄉試屢荐不售遂援例捐知縣分發山東初

至卽爲撫軍張朗齋所奇重委充各局發審清疑案多起上憲謂有折獄才補淄川縣連年搶護險工奏保以直隸州在任候補賞戴花翎淄邑匪風素熾迭殲巨魁民頌神明整飭文教立願學齋加課經古詩賦捐廉豐膏獎淄之文風一振會某大僚以微嫌中傷之遂解任去淄日士民遮道祖餞有泣下者後周撫軍馥知其冤奏請開復原官華謂牧令終難展布由知縣捐歸道班專究心時務之學周撫委以路礦等差濟南商埠由華發軔至今稱繁盛巡撫楊復委總工藝廠傳習所遂廣募藝徒分科教授實業得以發展更於博山改良磁業東省創設工業學堂宣統初南洋賽會充協會總理陳設東省出品多獲優譽事竣孫撫軍寶琦奏保二品頂戴部議獎三品並給四等商勳清廷遜位杜門謝客課子孫讀書消磨歲月蓋不勝故國之思焉

雷冲霄字劍華南程家莊人少負文名督學使者來臨累列高等旋食廩餼孫如瑾金國鈞兩學使皆深器之咸豐乙未登賢書次年成進士以卽用知縣分安徽親老改河南歷署濬葉等縣先後補澠池光山庚午丁母憂服闋仍發河南署內鄉濟源補溫縣巡撫鹿以治績卓著量移安陽後署林縣以疾解任宦豫多年鄉試累充同考官所得多知名士任葉縣日髮捻交乘親王僧格林沁及張相國之萬大兵駐境日需糗糧數十萬料理無少缺寇至率民登城守陴難民後至者審確開城納之歡聲雷動其蒞澠池也有左逆進沅者設局抗官斂民錢立僞太子僞官等名目冲霄廉得實暗率健役多名出其不意捕獲僞太子左恆升下於獄逆黨夜刼之擲火球藥然輒自焚後擒僞帥左進沅暨其先鋒等置於法事乃寢事親孝未選時家無負郭田日以月課資供甘旨後仕豫常迎其母至署以盡子職生

續修大荔縣志卷一
平好學精文藝宦遊三十年未嘗一日廢書遇兒輩及諸生課期每擬一程以示之準則所著有思補堂文稿光緒己酉以疾卒

雷銘璋字幼村冲霄長子以廩貢生捐道員候補河南公正廉明才足應變歷充製造局豫泉官銀錢局總會辦官錢局握全省金融權素號優差然亦弊數往往廣發紙幣騰挪現金以飽私囊銘璋任事首先稽核賬目嚴清積弊儲蓄現銀四十餘萬兩以備緩急宣統辛亥六月有莠民捏造謠言謂局將倒閉一致鄉民慌急擁擠萬餘求兌現銀渠等謀藉市中恐慌從中起事銘璋察其有異又慮存款不敷兌換一面稟請撫憲由藩庫接濟又向錢行假若干萬一面函致開封府祥符縣守令並各軍隊維持秩序次日風潮頓息奸民知其有備遂不敢動至今人傳誦之

雷培株字月岩冲霄次子光緒乙酉科副榜丁亥春部選廣西武緣

縣知縣抵省委署興業縣事縣爲粵西著名瘠缺培株因公賠累千餘金以清勤儉素自勵不取民間分文至無力延幕友案牘皆自批發到任閱月清案百起戊子冬蒞武緣本任此爲思恩府首邑實不附郭管轄安定等七土司訟事事不結者均歸縣審判遇土民上控暨民間呈詞隨到隨訊隨結民愛戴之壬寅捐升道員分發山東委稽查課吏館總辦師範傳習所各差登州府屬向有鹽灘有好事者於撫轅上稟謂可設局抽釐命培株往勘訖復命謂地皆貧戶設局徒滋擾累無益公家事遂中止嗣後奉委挑徒駭河尾閘以引黃河入海之道兼會辦利津縣遷民事宜殷勤開導俾河堤生靈免黃流之患又勸辦賑捐萬餘兩所至實心考察事舉而民不擾

梁翰冲字葵園梁家莊人少負文名家自明以來代傳詩禮然終厄於運無大顯著翰冲性聰慧八歲時從其堂長姪斗南讀戲作奎星

樓聯語斗南瞥見警異之曰叔才大可造吾家書香十餘世未發迹
爲千里駒者其叔也耶好爲之庶爲吾宗吐氣稍長習八比文試帖
詩卽楚楚有致十八歲入庠後督學案臨考古每列優等鄉試累荐
不售家舊藏書一樓翰冲竭數年之力盡讀之故吐詞淹雅迥出風
塵所著半耕堂詩文賦諸集及易髓書日載邑乘性至孝父賈於粵
東垂老假歸眷口衆多衣食維艱年八十一自往羌白鎮購物翰冲
時年十二自塾歸聞父徒步往號泣追之至半途父自鎮歸臥道旁
憊甚扶而起急承以背父曰汝幼何能勝遂扶掖以歸從此赴塾囑
母勿令父輕出門後授徒至老與及門談及往事未嘗不泣下村去
羌鎮五里同治元年回叛踞爲巢多帥攻克城毀六年閭鎮紳民以
翰冲爲洛西一帶人望設城防局勸捐舉翰冲督修各富家聞其任
事皆踴躍輸將不數月葺事至今賴之

成錦堂字伯琦石曹村人附貢生篤信好學賦性謙冲恬退不求聞達遇人無少長胥接以誠敬終身無疾言遽色於城內南偏建造屋數間教授其中號曰附郭草堂無事時足跡不輕出門幼年見李二曲反身錄愛不忍釋由此究心性理之學於周程張朱先儒諸書無不博覽精思身體力行私淑朝邑李時齋先生與楊仁甫賀復齋山西薛仁齋相師友切磋琢磨學益精進生平居敬窮理老而彌篤賢守令累顧草堂邀辦賑濟差徭及修志諸務潔己奉公井井有條卒年七十有九遺命祭葬一遵朱子家禮所著語錄三卷却病怡情錄四卷雜作三卷四禮儀注一卷父子兄弟之間藹然孝弟門內無幾微詬誶之風六世同堂鄉里稱之

郝紹言字厚菴城內人諸生少多病其父爲延拳師習技藝由此肢體強壯勇力逸羣厚重謙冲立身制行恪守朱伯廬家訓不矜奇立

異日用事物之間力求實踐不尚虛文同治壬戌幫辦軍務以生員
保荐訓導賞戴藍翎亂後閉門謝客不求仕進專心性理之學披覽
羣書研究精微家居課徒盡精致大所與游者芮城薛仁齋三原賀
復齋朝邑楊仁甫本邑成錦堂雷秀夫數君子居平治家有法自奉
儉約而於冠婚喪祭諸事必誠必備親族中稍有貧乏無不從豐俟
助年終稔知族人中有窘急者不待啓齒輒周給麥米錢文後七十
餘生子克紹箕裘人以爲厚德之報云

雷俊三字秀夫增生平原坊人性廉介沉靜寡言回亂後閉門謝客
博覽羣書究其指歸頗有心得一意講求程朱之學設帳城內從之
遊者舍幾不容以居敬窮理誠心正誼爲宗旨不屑屑於辭章之末
年逾古稀精神矍鑠猶日坐皋比講論不輟門下士若文鳳鳴李繼
茂馮慎源張明志與其壻夏若魯其尤著者馮夏後登進士餘俱守